

# MEJE PO CARTE PABLO TATINA, FILIPOS TOMARAPIWI TATINATSI

---

## Meje poxonaē Pablo tamropata pitaba xua tatina, Filipos tomarapiwi tatinatsi

**1** <sup>1</sup>Xan, Pablon, iru Timoteo, paxanbe ponbe amanaya pata tanacuichinbe Jesuś pata taichichipaexaēbe. Barapo carte patatinanbe pomonaē jinompa Filipos tomaratha. Patatinanbe daxita pomonaē Cristo Jesuś pejume cowuntsiwichi, pomonaē yatsicaewa Nacom piamonaē tatsi. Matautano iru patatinanbe pomonaē pecanamataxeinaewi pejume cowuntsi jiwi. Matautano iru patatinanbe pomonaē peyawenaewi pejume cowuntsi jiwitha, poxonaē yawena peatenewitha, xuano xua poxonaē apata pexaewa peacopeibiwitha. Barapomonaē Nacom piamonaē tatsi, yawa barapomonaē caemonaē naexana Cristo Jesustha. <sup>2</sup>Barabu Nacom, pon Waxa, amanaya paca yawenaena painya pia paca necaantobexae, yawa xua juntema jinompa paca exanaena. Iru barabu Jesucristo pon jiwi Pecanamataxeinaein baxua pacata exanaena.

## Meje yabara poxonaē Pablo tawuca Nacomtha pomonaē Nacom pejume cowuntsiwi

<sup>3</sup>Poxonaē paca yabara nanta xeineibatsi Tanacom tsipaebeiban paxam yabara. Jan tsaibinje: “Nacom juntu coyene weiweinan xua barapomonaē betiya necatsita dubenanaebiyaexae”, jan tsaibin. <sup>4</sup>Poxonaē Nacom pacata wuqueibatsi bichocono juntu coyene weiweinaeya pacata wuqueibatsi xua daxita paxam. <sup>5</sup>Nacomtha yabara tsipaeiban xua paxam tapana nebaru nacuichiwam Nacom Pejume Diwesi xua poxonaē aena pajume cowuntame xua beya anoxuae. <sup>6</sup>Bara xaniwaicha yaputan xua Nacom tamropata pitaba xua xanepanaya beta paca cana juntu coyene exana. Baxua Nacom paca cana juntu coyene exana ducuaēbiyaena beya poxonaē Nacom xanepanaya paca cana juntu coyene wetsina poxonaē

po mataqueitha Jesucristo patopaetsica. <sup>7</sup>Baxua jame inta xanepana xua tapaca yabara nanta xeinaewatsi, tsipei bichocono paca antobetsi. Poxonae bequein anoxuae jiwi pecubi botha neeta, yawano poxonae bequein caena bayatha pecapanenebiyae diwesi jume yabara jume yawenaeya cueicueijan jiwitha, yawano xua jiwitha tsita itapeinya xeinan xua barapo diwesi bara pexainyei diwesi jume, bapoxonae bara pana nebaru atenem. Daxota poxonae Nacom amanaya neyawena poxonae atene neexana ichamonae pia taneantobexae Nacom, iruru Nacom amanaya paca yawena pia paca necaantobexae poxonae paca atene exana ichamonae. <sup>8</sup>Nacom yaputane xua bichocono bara paca antobetsi daxita paxam, icha Jesucristo ichi xua daxita paca antobe. <sup>9</sup>Yawano Nacom paca tsiwucatsi xua equeicha matowa mataropeicha painya nepaca catsinexa peantobewa. Yawa muxuna wucan xua Nacom paca cana exanaena xua painya neyabara yaputaewa daxita coyenewan. Matautano muxuna wucan xua Nacom paca cana exanaena xua painya neitapetsiwa pocotsi coyene xua betiya paca cana exanaena. <sup>10</sup>Bapoxonae payaputaename xua itapetsiya paexanaename pocotsi coyene bichocono xanepana. Bapoxonae bichocono pajuntu coyene xanepanaya jinompaename. Yawano poxonae Cristo patopaetsica bapon jopa paca yabara paebi tsane xua panatsicuentame abe painya neexanaewan. <sup>11</sup>Paca tsiwucatsino xua Jesucristo paca necajuntu coyene yuca exanaenexa, xua po juntu coyene bichocono xanepana, xua daxota painya neexanaenexa pocotsiwa xua bichocono Nacom tsita xanepanatsi. Poxonae jiwi baxua paca cui taena bapoxonae jiwi Nacom wunae jaintsinchi jei tsane: “Maisa Nacom paca baru cui itura jinatsi, xua jinya neexanaexae barapo jiwi pia juntu coyenetha tatsi”, jei tsane barapo jiwi.

**Meje poxonae Pablo namchi: “Xua tapoponae  
coyenewa bara apara Cristo nexa”, jei**

<sup>12</sup>Tamonae pam, pomonae iru painya nejume cowuntsixae Jesús, ichichipan xua painya neyaputaewa tsane xua po coyene poxonae necana exana ichamonae xua jiwi pecubi botha neeta tayabara cueicueijeixae Jesucristo. Baxua tana necana exanaexae ichamonae jiwi taju jume tane Nacom pia pecapanenebiyae diwesi jume tatsi. <sup>13</sup>Daxota daxita soldadomonae pomonae xote umene pomonae peyapu eenaewi pepa pentacaponaein pia bo tatsi iruru seicayano ichamonaeru, daxita barapomonae yaputane xua xan jiwi pecubi botha neeta tapaebi ducuaenaebiyaexae Cristo nexa. <sup>14</sup>Pin bicheito, pomonae pejume cowuntsiwi Nacom, barapomonae netane xua jiwi pecubi botha ecan. Daxota barapomonae bichocono ichichipa xua pecueicueijejiwa Nacom Pejume Diwesi. Barapomonae jopa junuwiyo xua cui tsacatsacapiya pecueicueijejiwa Nacom Pejume Diwesi, tsipei bichocono jume cowuntatsi pon jiwi Pecanamataxeinaein.

<sup>15</sup>Ichamonae Cristo yabara cueicueijeichi apara poxoru saya tana neuwixae, tsipei ichichipa xua jiwi baru cui itura jinaena barapomonaetha, beyacaincha xua tana nebaru cui itura jinaewa tsane barapo jiwi. Ichitha jame, ichamonae beta xaniwaicha yabara paebatsi Cristo, pejuntu coyene xanepanaexae. <sup>16</sup>Barapomonaetha baxua exana taneantobexae peyaputaexae xua jiwi pecubi botha ecan tayabara jume yawenaeya cueicueijeixae Cristo pia pexeinya jume diwesi tatsi poxonaetha ichamonae abe yabara paeba barapo diwesi. <sup>17</sup>Pomonaetha Cristo yabara paebatsi tana neuwixae, saya apara poxoru peasiwixae xua ichamonae tana nepuna ponaewa tsane. Baxua exana poxoru ichichipa inta bichocono ayapube exana tsipei anoxuae ecan jiwi pecubi botha. <sup>18</sup>Bequein jiwi Cristo xainyeya yabara paebatsi poxoru tana neantobexae, ichacuitha metha tsipae poxoru tana neuwixae baxuan bapana jopa netsita ainya cuiyiyo. Saya jame poxonaetha ba jiwi Cristo yabara paebatsi, baxua ba jame bichocono nejuntu coyene weiweina exana.

<sup>19</sup>Yawa equeicha bichocono nejuntu coyene weiweina exanaponaena, tsipei yaputan xua painta wucame nawita Nacomtha. Yawa yaputan xua Jesucristo pia Pejumope tunaxu tatsi neyawena, pebaxuaxaebe bara Nacom necapanepaena pomonaetha tana neaitafaetabi jiwi weya. <sup>20</sup>Pocotsiwa xua taichichipaewa yawano pocotsiwa xua tawuna ewatsiwa, xua bapana jopa tacoutha naacauran tsane tajunuwixae xua tayabara cueicueijeixa Cristo. Jame bewa yabara cui tsacatsacapiya cueicueijan tsane Cristo, anoxuae, yawa xua bexa tsaneno. Ichichipan xua jiwi beta jume cowuntsina xua poxonaetha netane xua beta tapoponaewa Cristo nexa. Bapoxonaetha jiwi Cristo baru cui itura jinaeinchi poxonaetha necui taena xua beta xanepanaya poponan Cristo nexa. Baxua jiwi exanaena poxonaetha bequein asu poponaethan tsane, xua Cristo tatsita poponaewa yawa poxonaetha bequein tupaethan tsane xua Jesucristo tayabara cueicueijeixae. <sup>21</sup>Jame pocotsiwa netsita xanepana apara xua jiwi Cristo baru cui itura jinatsi, xua Cristo tatsita poponaewaxae. Ichitha icha tupaethan Cristo taein, baxua netsita xanepana bichocono, beyacaincha xua poxonaetha abu cataunxuae poponan, tsipei Cristo taein. <sup>22</sup>Awiya cataunxuae poponan daxota neitacupa xua awiya tanacuichiwa pocotsiwa pexanepanaetha coyenewa pon jiwi Pecanamataxeinaein nexa. Jopa yaputaeyino xua barapo naxobe coyenewabe jiwana itapetocuaein. <sup>23</sup>Inta bichocono ayapube xua barapo naxobe coyenewabe jiwana itapetan. Ichacuitha saya betupaethan xua tapoponaenexa tsane ichaxota Cristo poponaetha, tsipei baxua jame inta bichocono xanepana. <sup>24</sup>Daichitha ichacuitha jame bichocono inta ainya cui xua awiya tapoponaewa tapaca cayawenaenexatsi. <sup>25</sup>Ichitha yaputan bara, xua awiya poponan xua tapaca yawenaenexatsi xua awiya painya nejume cowunta dubenanaebiyanexa Cristo. Matautano yaputan xua bichocono equeicha

matowa painya nejũntũ coyene weiweina tsoponaenexa tsane. <sup>26</sup>Daxota poxonaē paca siwa ponaeinchi Cristo Jesús wũnaē pajainchiname xua equeicha tapaca casiwa ponaēxaetsi tsainchi.

<sup>27</sup>Saya beta xanepanaya painompare wanaca itorobixae Cristo pejume diwesi tatsitha. Daxota icha bequein paca siwa ponaeinchi, ichacuitha icha taju ecan, maisa ichichipan xua ichũn yabara benetsipaebina xua beta painya nejinompaewa. Bejume taein xua xanepanaya beta ajũntũyapusũya pajume cowũnta dubenanaebiyame Nacom. Mataũtano bejume taein xua caemonae pebũrũya jume daunweya pana nabaũ cueicueijam painya nejume cowũntsiwa Cristo. <sup>28</sup>Jopa pajunuwinde poxonaē imoxoyo abe paca exaneiba painya nepaca caaitafaetabi jiwi. Baxuan barapomonaē exana be tsita itapeinya xeina xua barapomonaē weraweracaena xua poxonaē po mataqueitha poxonaē Nacom yabara paebina jiwi xua penatsicuentsiwa abe peexanaexae xua irũ Nacom paca capanenebiyaena barapo mataqueitha. <sup>29</sup>Nacom pexeinya coyene paca cata painya netanacuichinexa Cristo xua poxonaē pajume cowũntame bapon, mataũtano xua poxonaē ichamonaē paca atene exana poxonaē ichamonaē abe paca yabara paeba painya nejume cowũntsixae bapon. <sup>30</sup>Waxainchi bara nanta jũpaya jume cowũntsiya daunweya paebatsi Nacom Pejume Diwesi. Baxua exanatsi icha be pocotsi coyeneya ichi poxonaē bayatha pana netaneme xua poxonaē jume daunweya paeban Nacom Pejume Diwesi, mataũta xua poxonaē bara pana neyabara jume taneme xua awiya cataunxuae exanaponan barapo coyeneya.

**Meje yabara xua Cristo peacopeibin pia coutha  
naexana, xua jopa peainya cui jitonjo**

**2** <sup>1</sup>Payaputaneme xua Cristo paca jũntũ coyene tsacaba xua beta painya nejinompaenexa. Mataũtano payaputaneme xua Cristo paca matateica pia painya nepaca caantobexae poxonaē ichamonaē abe pacata exana. Mataũtano payaputaneme xua Nacom pia Pejumope tũnaxũ tatsi paca baru jinompa. Mataũtano payaputaneme xua bapon paca antobe. Mataũtano payaputaneme xua Cristo nantanuweya paca yabara nanta xeina pia paca necayawenaenexa. <sup>2</sup>Icha daxita barapo pexainyei coyenein payaputaneme, bichocono pana nejũntũ coyene weiweina exande. Baxua painta exanaename poxonaē caemonae jũntema pajinompame, xua caemonae nantiya pana naantobem. Mataũtano baxua painta exanaename poxonaē xua caemonae nanta jũpaya pana nabaũ nanta xeiname yawano poxonaē nanta jũpaya ichipaeya paexaname. <sup>3</sup>Jopa paexanaeinde xua pocotsiwa be paasiwam xua saya meisa painya coutha nexa. Jopa paxeinaeinde po cui coyene xua jiwi peaebi coyene. Jame maisa painya coutha pana nayabara nanta xeinare xua pomonaē pecui pawĩ jiwi pam. Jame maisa sayano ichamonaē pacui yabara nanta

xeinare xua pepa peainya cuimonae xua beyacaincha paxam. <sup>4</sup>Jopa bewa panantaũtsim painyamonae jiton pon saya ichichipa nawita xua saya meisa penata exanaewa pexanepanae coyene. Jame bewa muxuna bapon taexanae ichamonae pocotsiwa xua ichamonae tsita pexeinya coyenetsi. <sup>5</sup>Paxam beta peburũya pananta jũpaya nanta xeinare icha Cristo Jesús ichi xua poxonae beta ba nanta xeina. Bapon bara iche:

<sup>6</sup> Bapon Cristo peyacuiya jinaein Nacom.

Bapon bequein barapara Nacom, daichitha bapon jopa pia coutha ichichipaeya daunweya botsiyo barapo coyenewa xua peyacuiya jũpae jinaein icha Nacom ichi poxonae patopeica po cae pin nacuathe tsique.

<sup>7</sup> Daichitha barapo coyene naitematsiya cuenta pon.

Bapon Cristo be jiton yacuiya naexana po cae pin nacuathe tsique xua Nacom amanaya petanacuichinexatsi xua pia coya peichichipaexae.

<sup>8</sup> Poxonae bapon naexana po cae pin nacuathe tsique bara yatsicaya be jiton coyene.

Bapoxonae pia coutha nacana exana be pon peacopeibin xua jopa peainya cui jitonyo. Bapon exana pocotsiwa Nacom itoroba poxonae jejei xua tũpa pecana exanaewatsi ichamonae, bequein barapo petũpaewa bichocono pin ura exanatsi xua tũpa naetotha.

<sup>9</sup> Daxota Nacom, Cristo bichocono barũ cui itura jinatsi poxonae Nacom athabe juinya exana xua Cristo athabe juinya exanatsi.

Matautano Nacom barũ cui itura jina, Cristo barũ cui itura jinatsi poxonae Nacom bapontha wũn duta, po wũn xua jei: “Pepa Pecanamataxeinaein”, jei. Barapo wũntha Jesús copatatsi xua bara pecanamataxeinaenexa pia peayapusũ itorobi coyenewatha daxita carepaya jiwi, matatsunpiwithano.

<sup>10</sup> Nacom barapo wũn cata xua daxota daxita jiwi poxonae jume taena barapo wũn pentabocotontha umenaena, xua Jesús wũnae pejainchinexa tsainchi, pepa Pecanamataxeinaeinxae itabocopiwi, irũrũ po irathepiwi, irũrũ pomonae jinompa ira bũxũpana wetsina.

<sup>11</sup> Daxita barapomonae Nacom wũnae

jainchinchí pon Nacom, Waxa, jei tsane:  
 “Maisa, Nacom paca barũ cui itura jinatsi,  
 tsipei bapon Jesucristo bara yatsicaya  
 pon pepa Pecanamataxeinaein jiwi”,  
 jei tsane daxita barapomonaē.

**Meje yabara xua ichamonaē, Nacom pejume  
 cowũntsiwi beta cui yaputainchi**

<sup>12</sup>Tamonae pam paxam pomonaē bichocono tapaca caantobewichi pam. Tsipei bayatha pana nejume cowũnteibame pocotsiwa paca itorobeibatsi poxonaē paca barũ ecatsi, daxota anoxuae nama bichocono pana nejume cowũnde beyacaincha xua poxonaē imoxoyo paca barũ ecatsi bequein tajũ ecan. Awiya cataunxuae carepaya daxita paxam barompaya paexana dubenanaebiyama pocotsiwa xanepana xua pocotsiwa Nacom ichichipa xua Nacom painya nepaca capanepaexae. Pana najũntũ coyene aura exande xua jopa paatsacande. Yawano pana najũntũ coyene junuwa exande Nacomtha, abe painya neexanaeyainwa. <sup>13</sup>Bapon Nacom paca cana jũntũ coyene yawena xua painya jũntũ coyene, jume barũ jejei pocotsiwa Nacom paca itoroba. Matautano Nacom paca yawena xua painya neexanaewam pocotsiwa Nacom ichichipa.

<sup>14</sup>Daxita coyenewan poxonaē paexaneibame jopa paexanaeinde pocotsiwa anaya painya jũntũ coyenewatha payabara paebame ichamonaē. Matautano jopa payabara najume matsontsonobinde baxua poxonaē Nacom pata exaneibame. <sup>15</sup>Bapoxonaē poxonaē jiwi paca cui taena, barapo jiwi jopa abeya paca cui yabara paebi tsane xua painya nenatsicuentsiwa xua abe painya neexanaexae. Matautano paca cui taena xua jopa ajũntũcoyenebeya pajinompam. Jame maisa painompare be Nacom piamonaē tatsi coyeneya. Matauta jopa abe paexanaeinde xua icha pomonaē anoxuae paca barũ jinompa pomonaē pemuxuitorobiwi xua pomonaē peantũcuiyapubewi xua poxonaē abe exana dubenanaebiya. Icha paxam beta pajinompame barapomonaē peitũtha tatsi, bara paca tane xua bara beta pajinompame bequein abe peexanaē jiwi nataetha, icha be pocotsi jũta coyeneya ichi xua opitei ba poton pentha tsurubenaē poxonaē quirei tsuncuae, bara ba jiwi tane barapo opiteiton bequein quirei tsuncuae taetha. <sup>16</sup>Daunweya pajume cowũnta dubenanaebiyama po diwesi jiwi ajũntũyapusũ exanatsi. Daxota poxonaē Cristo patopaetsica bichocono paca weyataeinchi tajũntũ coyenewatha beta xaniwaichiya painya nejinompaexae Nacom nexa. Bapoxonaē yaputaēin xua xaniwaicha bara beta paca yawenatsi xua painya nejume cowũntsiwam. <sup>17</sup>Bequein metha jiwi nebexubina xua tapaca cayawenaexaetsi, xua painya nejume cowũntsinexa, daichitha awiya jũntũ coyene weiweinan, irũrũ paxam paca cayawa jũntũ coyene weiweinaeinchi. <sup>18</sup>Daxota paxam

bewa pana nebarũ jũntũ coyene weiweinaename, bequein tũpaein xua tapaca cayawenaexaetsi xua painya nejume cowũntsinexa.

### Meje Timoteo yabara irũ xua Epafrodito yabara

<sup>19</sup>Icha Jesús pon jiwi Pecanamataxeinaein ichichipaena, methaunxuae itorobin Timoteo painya nepaca cataenexa tsane. Bapoxonae jũntũ coyene weiweinaein xua poxonae paca yabara jume taeinchi xua netsipaebina Timoteo. <sup>20</sup>Tsipei ichũn ajibi pon paca siwa yabara nanta xeina icha xan ichin. Saya meisa bapon Timoteo bichocono paca siwa yabara nanta xeina xua beta painya nejinompae coyenewa icha xan ichin xua bichocono paca siwa yabara nanta xeinatsi. <sup>21</sup>Ichamonae saya itapetsiya yabara nanta xeineiba barompaya pia peexanae coyenewan. Barapomonae jopa nanta xeinaeyo xua pocotsiwa Jesucristo pia petaexanaewatsi coyenewan tatsi. <sup>22</sup>Paxam pataneme xua Timoteo neyawena xua pecueicueijejiwa Nacom Pejume Diwesi, icha be coxiyũn ichichi xua poxonae pexanto yawenatsi. <sup>23</sup>Xua poxonae yaputaein xua ichamonae necana exanaena, bapoxonae beitorobin Timoteo xua pia paca necataenexa. <sup>24</sup>Jume cowũntan pon jiwi Pecanamataxeinaein xua necopata xua irũ methaunxuae paca siwa ponaeinchi.

<sup>25</sup>Matautano nanta xeinan xua bewa pacata itorobinchi Epafrodito, pon be taeweicho tatsicotaein, irũ pejume cowũntsixae Jesús, pon taneyawenaein xua cueicueijan Nacom Pejume Diwesi. Bapon jume daunweya pacuidubanbe poxonae bequein ichamonae abe yabara paeba Nacom Pejume Diwesi. Bapon Epafrodito, pon bayatha painta itorobame xua taneyawenaewa tsane pocotsiwa nantawenonan. <sup>26</sup>Maisa bichocono bapon bepaca taena daxita paxam. Bapon bichocono jũntũ coyene wecoyei tsipei pinae paxam payabara nanta xeiname, pinae pajam: “Maisa bichocono Epafrodito nacata atene tsocuae”, pinae pajam. <sup>27</sup>Bara xainyei, bapon bayatha bichocono atene bara muxu petũpae. Daichitha Nacom nantanuweya yabara nanta xeina xua Epafrodito axaibi peexanaewa tsainchi. Matautano Nacom irũ nantanuweya neyabara nanta xeina xua jopa bichocono tajũntũ coyene wecoyeiwa tsane icha bapon petũpaexae tsipae, xua beyacaincha jũntũ coyene wecoyan poxonae xua copiya, xua poxonae saya atene. <sup>28</sup>Daxota bichocono ichichipan xua bapon nainya pacata itorobinchi. Bapoxonae pajũntũ coyene weiweinaename xua equeicha painya netaexae tsane bapon. Matautano bapon itorobin xua jopa tapaca yabara jũntũ coyene wecoyeinexatsi. <sup>29</sup>Moya bara bichocono pantenta jũntũ coyene weiweinaeya jacobare Epafrodito xua pepatopaexae, pon jiwi Pecanamataxeinaein peitorobixae. Epafrodito beta pabarũ cui itura jinare. Bara paichinde ichamonaetha, pabarũ cui itura jinare pocotsimonae icha bapon ichi. <sup>30</sup>Bapon bara muxu pebexubichi xua Cristo petanacuichixaetsi. Bapon penapepeichiwatha

naexana, inta pewetsinexa pocotsiwa xua jopa paca itacupaeyo xua painta exaname.

**Meje yabara xua po coyene pepa pejuntũ coyene xanepanaewa**

**3** <sup>1</sup>Tamonae pam, pomonae irũ painya nejume cowuntsixae Jesús, pajuntũ coyene weiweinare pon jiwi Pecanamataxeinaein pia pacata exanaexae. Jopa afaetabinyo xua equeicha jũpa matowa tapacata tinaewatsi pocotsiwa bayatha pacata tinatsi. Bara apara baxua paca yawena xua beta painya netsita jinompaenexa Nacom. <sup>2</sup>Dota pam pomonae peantucoyenebe jiwi yawano xua abe peexanaewi. Mataũta dota pam pomonae judiomonae pia cui coyeneyatha tatsi paca itoroba xua painya nenawi thabiwam po coyene xua pawĩ thabame pebiwi xua ichaxota nareixacaena. Barapomonae nanta xeina xua icha baxua exanaena Nacom capanenebiya exanaena. <sup>3</sup>Waxainchi xaniwaicha barapomonaetsi pomonae yatsicaewa Nacom watsita jũntũ coyene xanepanaewichi, tsipei Nacom pia Pejumope tũnaxũ tatsi naca yawena xua jume cowũntatsi watanacuichinexa Nacom. Mataũtano wajume cowuntsixae Cristo Jesús, daxota bapontha wũnae jaintatsi pia wanacata exanaexae. Waxainchi jopa nanta xeinaetsi xua poxonae ichamonae naca wi thaba, barapo coyene naca jũntũ coyene xanepana exana Nacomtha. <sup>4</sup>Ichax pebiwi itacupaetsipatsi xua jume cowũnta xua pia coutha nacapanenebiya, barapoxonae irũ xan neitacupaetsipa xua jume cowũntan xua tacoutha tanacapanepaewa beyacaincha xua barapo pebiwi. Ichitha pebiwi irũ xan, jopa pana neitacupaeyo xua pana nacapanenebiyan pata coutha. <sup>5</sup>Caena bayatha tacoutha nanta xeinan xua tacoutha tana nacapanepaewa pocotsiwe taexanaexae. Poxonae naexanan ocho po matabitha newi thaba. Mataũtano xan bara israelmonae pia saineiwi jiwanan. Mataũtano Benjamín piamonae tatsi jiwanan tsipei pia pemomoxi susato jiwi jiwanapin tatsin. Mataũtano yacuiya naexanan xua hebreo jume tacueicueijejewa, taxa irũ taena hebreo jume pepaebiwixae. Mataũtano bayatha fariseomonaepin naexanan, xua daxota daxita coyeneya beta xanepanaya exanan be pocotsi coyeneya Moisés pia peitorobi coyenewatha itoroba. <sup>6</sup>Bichocono jume cowũntan pocotsiwan fariseomonaepia pecuidubi coyenewan tatsi. Daxota abe exanan pomonaetha pomonae Jesús pejume cowũntsiwichi. Tsipei daxita coyenein exanan pocotsiwa Moisés pia peitorobi coyenewa itoroba, daxota nanta xeinan xua yatsicaewa jũntũ coyene xanepanan Nacomtha xua jopa xeinaeinjo tanatsicuentisiwa xua abe taexanae coyenewa. <sup>7</sup>Daxita po coyenein xua bayatha inta netsita ainya cui, porucae jopa daichiyo. Anoxuae netsita acoyenebe barapo coyenein, tajume cowũntsinexa Cristo. <sup>8</sup>Mataũtano daxita inta newepu napuxana pocotsiwa xua bayatha nanta xeinan. Xua yaputan Cristo Jesús



Tanecanamataxeinaein, baxua jame inta wūnae bichocono beyacaincha xua daxita pocotsi coyenewan copiya bayatha xeinan. Cristo Pejume Diwesi tacueicueijeixae daxita newepu napuxana pocotsi coyenewan bayatha xeinan. Barapo coyenein yabara nanta xeinan, xua barapo coyenein abe, be pocotsiwa jiwi xuba pocotsiwa abe. Po coyenein xua copitha xeinan barapo coyenein pentan tanantauntsinexa Cristo pon Tanecanamataxeinaein. <sup>9</sup>Ichichipan xua be caein naexanan Cristotha xua tajūntū coyene Nacom petsita xanepanaenexatsi bapon pia tana necana exanaexae barapo coyene. Barapo coyene necana exana Nacom, jopa poxoruyo xua tajume cowūntsixae Moisés pia peitorobi coyenewa xua daxota tajūntū coyene xanepana Nacomtha. Jame barapo coyene necana exana Nacom xua be caein naexanan Cristotha, poxonae jume cowūntan, poxoru Nacom tanecatsixae pejūntū coyene xanepanaewa. Barapocotsi coyenewa ba Nacom cata jiwitha pomonaetha pomonae pejume cowūntsiwixatsi. <sup>10</sup>Pocotsiwa taichichipaewa baraxua xua apara jame tayaputaewa Cristo. Mataūtano be yaputaein peayapusū itorobiwa, po peayapusū itorobi coyenewatha Jesús asū exainchi barapo petūpae cuiuru coyene weya. Bequein ichamonae atene neexanaena, icha Cristo ichichi xua poxonae atene exanatsi ichamonae, daichitha awiya cataunxuae ichichipan xua taexanaewa pocotsiwa xua Nacom ichichipa. Poxonae Jesús tsitūpa jiwi, barapara exana pocotsiwa Nacom ichichipa, jopa exanaeyo xua pocotsiwa bapon pia coutha ichichipa. Xan bara jūta ichiya ichichipa exanan xua pocotsiwa Nacom ichichipa. <sup>11</sup>Yawano ichichipan xua baxuan exanaein beya poxonae Nacom asū neexanaena po mataqueitha Nacom asū exanaena petūpae cuiuru coyene weya pomonae irū pejume cowūntsiwixatsi.

**Meje yabara xua po pentoma Nacom pia wanaca  
catsiwa, jūntema beta waexanaexae**

<sup>12</sup>Jopa paebinyo xua xeinan barapo coyene, po coyeneyatha xua Nacom asū neexana petūpae cuiuru coyene weya. Mataūtano jopa paebinyo xua Nacom bayatha xaniwaicha jūntū coyene xanepana neexana xua jopa daxota abe taexanaewa. Daichitha awiya yabara nacuichiya exana ducuaenaebiyān xua taxeinaenexa barapo coyenewa tsipei Cristo Jesús copiya neexana be piamonae jiton tatsin. <sup>13</sup>Tamonae pam, pomonae irū painya nejume cowūntsixae Jesús, paca tsipaebatsi xua jopa cataunxuae baxua wetsinyo xua tajūntū coyene bara xaniwaicha bayatha nejūntū coyene xanepana exana xua jopa xeinaeyo peabe coyenewiyo. Ichitha bara saya cae coyene exanan. Jūntemainan xua pocotsiwan bayatha exanan, saya meisa bichocono yabara nacuitan pocotsiwa bexa tsane xeinaein. <sup>14</sup>Bichocono ajūntūyapusūya exana ducuaenaebiyān xua pocotsiwa Nacom ichichipa, beya taxeinaenexa po pentoma pocotsiwa

Nacom naca catsina poxonae naca wabina pia nacua beicha caemonae wayawa jinompaexae Cristo Jesús.

<sup>15</sup>Daxita waxainchi, pomonaetsi xua bayatha beta yabara yaputaetaepoinchi wajume cowuntsiwa Nacom, waxainchi bewa yabara nanta xeinaetsi po coyene xua waxainchi cataunxuae abũ jopa xeinaetsi po jũntũ coyene xua yatsicaya xanepana xua daxota jopa abe exanaetsi. Daichitha icha paxam, icha coyeneya payabara nanta xeiname pocotsiwa xuaunxuae paca tsipaebatsi, bapoxonae Nacom yabara paca yaputane exanaena baxua. <sup>16</sup>Daichitha waxainchi bewa awiya jume cowũnta dubenanaebiyaetsi pocotsiwa bayatha Nacom naca yaputane exana.

<sup>17</sup>Tamonae pam, pomonae irũ painya nejume cowuntsixae Cristo Jesús, paexanaponde icha ichin pocotsiwa xua exanaponan. Beta pacui taema poxonae pomonae xua jinompa xua poxonae exanapona, icha pocotsi coyeneya paichin poxonae paca cuidubatsi. <sup>18</sup>Bayatha matowa paca tsipaebatsi. Anoxuae equeicha paca tsipaebatsi, beya nama wecoyeya paca tsipaebatsi. Paca jeichi: “Pinmonae jinompa pomonae aichaxaibi po diwesi po coyene xua Cristo naetotha tsitũpa jiwi”, paca jeichi. <sup>19</sup>Nacom barapomonae weraweraca exanaena. Barapomonae saya yabara nanta xeineiba penabanaewa xua matautano pocotsiwa Moisés pia peitorobi coyenewatha itoroba xua barapo pexaewa yabara. Barapomonae yabara atsaca pocotsi coyene bequein barapomonae bewa ita aura tsane baxua. Daichitha barapomonae jopa yabara ita auriyo baxua. Saya barapomonae yabara nanta xeina nawita pocotsiwan xua xeina po irathe. Jopa yabara nanta xeinaeyo pocotsiwan xua Nacom nexa. <sup>20</sup>Ichitha nama waxainchi Nacom pia nacua tatsipiwichi. Anoxuae waxainchi ewatatsi xua patopaetsica itaboco wetsica pon jiwi Pecapanenebiyaein, pon jiwi Pecanamataxeinaein, bapon Jesucristo. <sup>21</sup>Wapepon, po pepon jopa wũnaetsi, po pepon atene yawa xua tũpaena bapon equeicha icha pepon naca exanaena, pocotsi pepon icha Cristo ichi xua po pia pepon tatsi bichocono xeina pexeinya peitũpanae coicha, xua po pia pepon tatsi jopa ateneyo, yawa xua jopa tũpaeyo. Baxuan Cristo nacata exanaena pia peayapusũ itorobi coyenewatha, po peayapusũ itorobi coyenewatha itacũpatsi xua daxita pecanamataxeinaewa.

**Meje yabara xua Pablo jei: “Ataya pajũntũ coyene  
weiweineibare pon jiwi Pecanamataxeinaeintha”, jei**

**4** <sup>1</sup>Tamonae pam, pomonae irũ painya nejume cowuntsixae Cristo Jesús, paxam pomonae bichocono tapaca caantobewichi pam. Bichocono ichichipan xua tapaca cataewa tsainchi. Paxam pomonae bichocono pana nejũntũ coyene weiweina exaname. Matautano paxam pomonae Nacom necata painya nejume cowuntsinexa Jesustha xua be tana nematomatsiwa, xua neyaputane exana xua bara exanan

pocotsiwa xanepana poxonae tanacuitan bapon. Tamonae pam, paxam pomonae tapaca caantobewichi pam. Awiya beta pajume cowanta dubenanaebiyama pon jiwi Pecanamataxeinaein.

<sup>2</sup>Itoroban powa pewun Evodia, ichawayono xua powa pewun Síntique xua barapowayobe equeicha penaita coxonaenexabe xua be yatsicaewa caemonae jitowayo penaexanaenexabe pon jiwi Pecanamataxeinaein piamonae jitowayobexae tatsi. <sup>3</sup>Xam ponxaem yatsicaewa tanebaru nacuichim Nacom Pejume Diwesi, caitorobatsi xua barapowayobe neyawenaenexa tsane. Barapowayobe bayatha neyawenabe poxonae cueicueijan Nacom pia pecapanenebiyae diwesi. Barapoxonae barapowayobe, iru Clemente iru ichamonaeno daxita barapomonae daunweya nebaru nacuita. Daxita barapomonae wun dubatsi diborotha po diborotha xua Nacom capanenebiya tsaibi jiwi xua jiwi pecatsibeibinexatsi peajuntuyapusawa poxonae wun dubeiba barapo diborotha, xua Nacom pia diboro tatsi.

<sup>4</sup>Paca jeichi: “Ataya patsita juntú coyene weiweineibare pon jiwi Pecanamataxeinaein”, paca jeichi. Equeicha paca jeichi: “Ataya patsita juntú coyene weiweineibare”, paca jeichi. <sup>5</sup>Barabu beta pajinompaename xua daxita jiwi painya pia paca yabara yaputaenexa xua bara paxam pomonae pejuntú coyene xanepanaewi pam, tsipei imoxoyo patopaetsica pon jiwi Pecanamataxeinaein.

<sup>6</sup>Jopa payabara nanta xeinaeinde nawita pocotsiwa ba paca juntú deideijeji exana. Jame maisa Nacom patsipaebibare daxita coyenein yabara. Nacom yabara pawuqueibare daxita coyenein. Matautano payabara jacobebare Nacom poxonae pocotsiwan paca catsibeiba pocotsiwan xua panantawenoname. <sup>7</sup>Barapoxonae Nacom paca juntú coyene juntemiya jinompa exanaena. Barapo juntemiya jinompa coyenewa jiwi ba jopa yabara yaputaeyo, tsipei bichocono pexeinya coyenewa. Barapo juntemiya jinompa coyenewa paca juntú coyene eenaena. Matautano paca eenaena xua daxota beta painya nenanta xeinaewa tsane. Baxua paca cana exana paca necayawa jinompaexae Cristo Jesús.

**Meje yabara poxonae Pablo jei: “Payabara nanta  
xeinare daxitan pocotsiwan xua wunae”, jei**

<sup>8</sup>Tamonae pam, pomonae iru painya nejume cowantsixae Jesús, paca tsipaebatsi nama anoxuae pocotsiwa xua tabu ducua paca tsipaebatsi pocotsiwa xua nama wetan. Payabara nanta xeinare daxitan meje xuaje po coyenein: po coyenein xua pexainyeiwan, matautano po coyenein xua jiwi yabara nanta xeina xua pexanepanaewan, matautano po coyenein xua xaniwaichiya pecana exanaewan, matautano po coyenein xua Nacom petsita exanaewatsi pexeinya juntú coyenein, matautano xua po coyenein

pexeinya peitupanae coyenewan, matautano po coyenein xua jiwi peyabara baru cui itura jinaewan. Matapainya payabara nanta xeinare daxita coyenein po coyenein Nacom tsita coyene xanepanatsi, matautano daxita po coyenein jiwi bewa wuna jainchina xua barapo coyenein pexanepanaexae.

<sup>9</sup>Paexanaponde po coyene xua paca cuidubatsi xua daxota panejume jejam. Paexanaponde po coyene xua panejume taneme xua cueicueijan. Matautano paexanaponde po coyene xua pana necui taneme xua exanan. Bara baxuan paexanaponde bapoxonae Nacom pon peyawa jinaein juntea pepoponae juntu coyenewa, bara bapon paca yawa poponaena.

### **Meje yabara paratixi po paratixi jiwi cata Pablo nexa**

<sup>10</sup>Tsita juntu coyene weiweinan pon jiwi Pecanamataxeinaein xua matapainya equeicha tapana neyabara nanta xeinaewam. Bayatha bequein pana neyabara nanta xeiname, daichitha jopa paca itacupaeyo xua tapana neyawenaexam. <sup>11</sup>Jopa paca tsipaebichi xua ichawa yabara pocotsiwa tanantawenonaewa, tsipei bayatha tacoutha yabara nacuiduban xua juntea tapoponaewa pocotsiwa xua xeinan bequein inta acoibi ichawa. <sup>12</sup>Yaputan xua beta poponan poxonae bequein be pon tacopeibin. Matautano yaputan xua beta poponan poxonae nawita taxeinaein. Bayatha nacuiduban xua juntea tapoponae coyenewanexa tsane bequein tonsanan, yawano bequein ichacuiha jainpeiban. Nacuiduban xua juntea tapoponae coyenewanexa tsane bara bequein xeineiban beyacaincha pocotsiwa tanantawenonaewa, yawano ichacuiha bequein inta aibi pocotsiwa xua tanantawenonaewa. <sup>13</sup>Neitacupa xua daxita taexanaewa tsipei Cristo necata pia peantuyapusuwa. <sup>14</sup>Daichitha paxam bichocono wunae painta exaname poxonae pana neyawename tapana nesiwamxae poxonae ichamonae jopa xanepanaya necana exanaeyo.

<sup>15</sup>Paxam Filipos tomarapiwi pam, payaputaneme poxonae copiya tamropata pitaban xua cueicueijan Nacom Pejume Diwesi, barapoxonae meisa paxam paratixi pana necataponame poxonae Macedonia nacua weya ponan. Icha tomarapiwi pomonae pejume cowuntsiwi jopa necatsiyo paratixi. Barapo paratixi pana necataponame be pentoma painta exaname yabara tapana netsipaebinexam po coyene xua tapaca cayawenaewatsi painya nejume cowuntsiwanexa Nacom. <sup>16</sup>Poxonae cataunxuae Tesalónica tomaratha poponan, paxam painta itorobame paratixi. Bapoxonae equeicha cotacaya painta itorobame icha paratixi xua tacana nantawenonaenexa. <sup>17</sup>Paca tsipaebatsi baxua jopa poxoruyo xua saya taichichipaexae equeicha xua tapanecatsiwam tsane icha paratixi. Jame apara poxoru ichichipan xua paxam bexa paxeinaename po pentoma xua Nacom paca catsina tapana neyawenaemxaem.

<sup>18</sup>Bayatha matowa pana necatame beyacaincha pocotsiwa xua nantawenonan. Pocotsi paratixi painta itorobame xua inta capona Epafrodito, baxua inta bichocono nawita beyacaincha xua pocotsiwa nantawenonan. Barapocotsiwa pocotsiwa painta itorobame, Nacom bichocono ichichipa. Nacom baxua ichichipa icha ichi poxonae bichocono ichichipa po petuxusi tuxueiwa jiwi tuxusi exana Nacom nexa, yawa xua poxonae po duwei petautsiwa xua tuxusi exana Nacom nexa. Barapo pecana exanae coyenewabe Nacom tsita coyene xanepanatsi, yawa juntu coyene weiweina exanatsi. <sup>19</sup>Tanacom daxita paca catsina pocotsiwa xua panantawenoname, tsipei bapon bichocono copei pexeinaein pocotsiwa xua bichocono peitupanaewa. Paca catsina baxua painya neyawa jinompaexae Cristo Jesús. <sup>20</sup>iBarabu jiwi, Nacom pon Waxa, ataya wanae jainchinchí! Je, bara ichi tsane.

#### **Meje yabara xua Pablo najume weta barapo carte**

<sup>21</sup>Painta jacobare pomonae baxotiya jinompa pomonae Jesucristo pejume cowuntsiwichi pomonae yatsicaewa Nacom piamonae tatsi. Iru pomonae nebaru jinompa xote pomonae xua iru pejume cowuntsiwichi Cristo Jesús, barapomonae paca jacobae. <sup>22</sup>Iruu daxita pomonae Jesús pejume cowuntsiwichi pomonae yatsicaewa Nacom piamonae tatsi, pomonae po tomarathepiwi, barapomonae paca jacobaru. Iruu paca jacobae pomonae romanomonae itorobiya pia pepa peewatsinchi pia botha tatsi tanacuitatsi. Barapomonae bichocono paca jacobae, beyacaincha ichamonae poxonae paca jacobae.

<sup>23</sup>Barabu Jesucristo, pon Wanacanamataxeinaein, daxita paxam paca juntu coyene yawenaena pia paca necaantobexae.

Baja Pablo.